



Komunikadu Imprensa
Munisípiu Ermera
09 Feveireiru 2024

**Programa Apoiu Seguransa Komunitáriu (PASK) kontinua haluan iha
Suku Lihu**
JSMP Asina Nota Entendimentu ho Suku Lihu

JSMP nia Programa Apoiu Seguransa Komunitáriu (PASK) kontinua habelar iha Suku Lihu nune'e iha 02 Feveireiru 2024, JSMP Asina Nota Entendimentu (MoU) ho Suku Lihu, Postu Administrativu Railaku, Munisípiu Ermera. Nota Entendimentu ne'e primeiravés estabelese entre parte rua, ne'ebé JSMP representa hosi Diretora Ezekutiva, Sra. Ana Paula Marçal no Suku Lihu representa hosi Xefe Suku, Sr. Bernardo dos Santos Babo.

Objetivu hosi Nota Entendimentu ne'e atu asegura komunikasaun no koordinasaun ne'ebé di'ak entre parte rua durante implementasaun Programa Apoiu Seguransa Komunitáriu (PASK) no mós bele asegura implementasaun atividade sira ne'ebé mak atu hala'o bele implementa ho di'ak no mós bele asegura katak atividade sira ne'ebé mak hala'o ne'e tuir duni objetivu programa ne'e rasik.

“JSMP agradese tebes ba Suku Lihu ho nia estrutura tomak ne'ebé hakarak serbisu hamutuk ho JSMP hodi bele realiza programa PASK nian iha Suku Lihu. Espera ho serbisu hamutuk ne'e bele tulun comunidade sira atu bele asesu ba iha justisa no hasa'e konsensializasaun comunidade iha área justisa nian tantu iha nível komunitáriu no nasional”, dehan Diretora JSMP, Sra. Ana Paula Marçal.

Xefi Suku Lihu Sr. Bernardo dos Santos Babo, iha nia intervensaun hato'o agradese boot tebes ba JSMP, tanba hili ona Suku Lihu hodi bele serbisu hamutuk ba iha implementasaun programa ne'e. Estrutura tomak suku nian prontu atu kolabora tanba konsidera programa ne'e importante tebes ne'ebé atu fasilita comunidade sira bele asesu ba informasaun sira relasiona ho justisa.

Xefe suku hatutan liután katak iha suku ne'e iha problema barak tanba ne'e ho prezensa JSMP nian bele fó hanoin ba solusaun formál nian ba kazu disputa sira hodi ajuda estrutura suku bele rezolve problema disputa sira iha suku laran.

Iha parte seluk, iha intervensaun Segundu Komandante Eskuadra Railaku, Sra. Armenia M. Tavares nian haktuir katak PNTL Eskuarda Railaku prontu apoiu no kolabra ho JSMP hodi bele implementa programa JSMP nian iha suku tarjetu sira, tanba konsidera programa ne'e importante tebes no bele ajuda Polisia nia knaar balun.

Iha ikus, Administrador Postu Railako, Sr. Tomas da Costa Soares, Lic. Ed, haktuir katak agradese tebes ba JSMP tanba antes ne'e serbisu hamutuk ona ho Suku Samalete no haluan tan ba Suku Lihu, ho nune'e espera katak programa ida ne'e bele continua tan ba suku sira seluk.

Administrador hatutan mos katak rezultadu hosi serbisu hamutuk ho suku Samalete hatudu katak Suku Samalete laiha problema no suku refere komesa hakmatek no espera katak programa ne'e bele iha nia kontinuasaun ba suku seluk atu bele hetan mos asesu ba informasaun legal ne'ebé fornese hosi JSMP.

Iha serimonia asina MoU ne'e partisipa hosi Administrador Postu Administrativu Railaku, Sr. Tomás da Costa Soares, Lic. Ed, Segundu Komandante PNTL Eskuarda Railaku, Inspetora Armenia M. Tavares no akompaña mos hosi xefe aldeia 4 (haat), lia-nain, delegada fetu no mane, OPS Suku Lihu no mos representante Veteranu hosi Suku Lihu.

Programa ne'e ho nia objetivu mak atu tulun comunidade lokal sira no intervenente sira iha sistema justisa nasional hodi hadiak ligasaun entre nia sistema sira no mos hadiak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan :

1. Observa prosesu rezolusaun disputa komunitáriu no hala'o peskiza lokal
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia, tribunál, prokuradoria ba iha suku sira tarjetu
4. Advokasia atu hadiak liutan ligasaun comunidade sira ho justisa formal
5. Fahe informasaun kona-ba asesu ba sistema justisa formal.
6. Introdús *Case Log* ba Konsellu suku sira no OPS

Atividade ne'e, realiza hosi JSMP, liuhosi Programa Apoiu Seguransa Komunitária (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl